

# «Noss products han lur valor»

Hotelleriesuisse Grischun: Radunanza da delegads a Claustra

DA GION NUTEGN STGIER / ANR

■ **A la hotellaria grischuna para quai dad ir meglier. Survalitar quella situaziun saja exagerà cun esser stads ils davos diesch onn plitost maghers. Ils hoteliers avessan d'esser pli conscients da sasezs e savens manca ad els la fidanza, èsi vegnì ditg a la radunanza da delegads a Claustra.** Suenter 29 onns èn ils hoteliers grischuns danovamain sa radunads a Claustra per salvar lur radunanza da delegads da l'uniun. En egl è lura crudà che tranter ils numerus giasts eran blers represchentants da la politica naziunala, chantunala e regiunala. *Ernst Wyrsh*, il president da Hotelleriesuisse, ha ditg che lur preschientscha fettschia onur e confermia er lur bainvulientscha envers la hotellaria e gastronomia.

## In bun exempel

Wyrsh, el ch'è vegnì elegi per ulteriurs trais onns sco president da Hotelleriesuisse Grischun, ha ditg che als hoteliers manchia savens la confidenza per avair success e per ir la dretga via. Sa fidar munta da betg esser pli grond che la concorrenza, mabain per in pau meglier, ha ditg il hotelier da Tavau. La realitad saja er ch'els hotels grischuns sajan megliers che l'aspectativa dal giast ed er en quella chaussa manchia anc adina ina tscherta fidanza tranter giast ed hotelier. Sa fidar, quai saja er la basa da success da *Klaus Schwab*, l'iniziant dal Forum mundial d'economia a Tavau. Cun avair bunamain l'entir mund confidenza tar el daventia l'occurrènta mintg'onn ina da las



Ils quatter referents: Alois Vinzens, Andreas Züllig, Jörg Schmid e Jon Domenic Parolini (da san.).

FOTO G. N. STGIER

pli impurtantas sin champ politic, economic e da la scienza, ha menziunà Wyrsh.

## Novas forzas per la suprastanza

Sco adina han las tractandas statutaricas strusch procurà per discussiuns. Il quint annual cun entradas ed expensas da 366'500 francs serra cun en gudogn da

stgars 700 francs. Tar las entradas èn las contribuziuns dals commembers cun 331'000 francs la gronda summa. Da nov en suprastanza da Hotelleriesuisse Grischun èn vegnidas elegidas las suandantas persunas: *Gérard Carigiet*, Breil, *Thierry Geiger*, Puntraschigna, *Tamara Henderson*, Tavau, *Christoph Schlatter*, San Murezzan e *Marco R. Zanolari*, Ragaz Bogn.

**100 000 pernottaziuns supplementaras** *Jürg Domenig*, il mainagestiu da Hotelleriesuisse Grischun, ha preschentà in nov project da marketing. La finamira da quel è che almain 35 dad 85 hotels grischuns sa participeschian a quell'acziun da marketing che duai ir sur tschintg onns. Ultra da quai duess il project chaschunar supplementar 100'000 pernottaziuns. Il project sa drizza a l'entschatta

cunzunt a giasts pli bainstants ed individuals dals Stadis da Golf e pli tard lura er a giasts da la China e dals Stadis Unids da l'America.

## Laud per ils possessurs da segundas abitaziuns

*Jörg Schmid*, il president da Grischun Vacanzas ed anteriur directur da Svizra Turissem, ha ditg ch'el cusseglia als hoteliers grischuns d'esser main activs cun l'autocritica. En Svizra ed er en l'exteriur haja la hotellaria grischuna in fitg bun num e la stima saja er exemplarica. A pled è er vegnì *Alois Vinzens*, il directur da la Banca chantunala. El ha cunzunt menziunà la valor dals giasts da las segundas abitaziuns. Els sajan fitg fidads, els stimian il Grischun e na sajan er finzialmain betg ils pli povers.

## Vender il product

*Andreas Züllig*, el che stat al timun da Hotelleriesuisse, ha en spezial fatg attent a ses collegas da vender in entir product, pertge ils giasts vulan savair tge ch'els survegnan per il pretsch. Il giast saja anc adina pront da pajar per qualitat e quella saja avant maun er en ils hotels da noss chantun. Cusseglier guvernativ *Jon Domenic Parolini* ha ditg ch'els products grischuns hajan lur valor. En l'avegnir duajan ils hoteliers cooperar pli ferm, davenar pli autentics cun lur products e dar dapli paisa a la regiunalitad.

En in onn ha lieu il giubileum da 100 onns Hotelleriesuisse Grischun e quai a Passugg. En il center da la festa da giubileum duajan star l'avegnir e la giuventegna.